



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 3

**Iran den yimjung tezungzüktep
yanglutsü anogo ishika agitsü: Rubio**

**Tamil Nadu CM Vijay-i
Bodhbarnü Delhi**

VOL. XXIII ISSUE NO. 223 (ADOK 223) DIMAPUR RASEMNÜ (WEDNESDAY) MONUPII (MAY) 27, 2026

₹ 5.00

Nagaland nung mapa inyakertem 'heat wave' nungi kümzüka ayutsü tuyur

Dimapur, May 26, 2026 (TYO): Nagaland nung mapa inyakertem aser aayangertem tatsük nungi kümzüka ayutsü atema Labour department -i metetdaksüogo.

Labour department-i iba tetuyuba ya employers, occupiers, industries, establishments, contractors, construction agencies, factories, brick kilns aser sendaktepa alir ajak nem agütsüogo.

Nagaland kübok sector balala nung mapa inyakertem extreme heat aser high temperatures nungi kümzüka ayutsüla aser iba ya Union Labour & Employment Ministry nungi osang aruba nung ajemdaker agütsür ta department-isa metetdaksü.

Anü kanga mapudang aser tatsük masüdag mapa tasak aser anibelega inyakba mapatem inyakdaksütsüla. Mapa inyakertem anisüngzüksü aser

atema mapang lemsatsüla ta department-isa tetuyuba agütsüogo.

Parnokisa mapa inyakba tesem ajak nung tzü temkong ayutsü, rest sheds, shaded areas aser cooling arrangements asütsü metetdaksüogo.

Maneni, mapa inyakdak ajak nung ice packs aser heat illness prevention kits dena emergency first-aid materials ayutsüla ta department-isa tetuyuba agütsüogo.

Mapa inyaker kar danga tatsük agi timtemba, temang nung tzü maliba mesüra heat stroke agi kangshiba ama ajitetra medical teyari agütsütsüla aser anameta aliba health facilities nung mapang shia health check-ups aser emergency medical support ateam tesentaktep ayutsüla ta Nagaland Labour department-isa metetdaksüogo.

Naga nunger trok chioktsü akhanger

Imphal, May 26, 2026 (Agencies): Hombarnü Imphal nung Naga nunger den Meitei pusemertem dena Kuki telungpurtemi civilian trok pur aoba chioktsü rongshia lungkak aitba sentong ka agiogo.

Iba sentong ya Naga People's Union Imphal ajanga ayongzük aser Tribal Market area nungi tenzüker Chief Minister Y Khemchand Singh'er ki tashi ao. Ajisüaka Chief Minister'er ki atongsü anasa Palace Gate nung sepaitem lungkak aiteritem noktanga liasü.

Tenokdangbatem liaka teshimtet nübotemi chief minister den ajuruteptsü temelaba agütsü aser parnoki Naga nunger trok pur aoba atema mapa inyaktsü indang memorandum ka agütsü.

Iba memorandum nung Kuki telungpurtemi Naga nunger pur aoba tai tongloksüba den Deputy Chief Minister Nemcha Kipgen mapa nungi anentsütsü takhangba agütsü lir.

Nemcha Kipgen kinungbo ya Kuki National Front (Presidential) tanishisang lir aser Naga nunger

pur aoba nung iba telok sendaktepa lir ta Naga People's Union Imphal-isa.

Parnokisa Centre, Manipur sorkar aser Kuki telungpur teloktem tsünga Suspension of Operations (SoO) agreement agientsü takhangba agütsüogo.

Naga People's Union Imphal-isa "Kuki refugees" meyipa yoktsü takhangba agütsü.

Kangpokpi district nung May 13 nü arogo lennir asem tepsetba sülen mapang tatsüka lir Kangpokpi aser Senapati district tem nung nisung 38 pur ao.

Iba sülen ketdangsürtemi Naga tsürtem aser Kuki nunger dena nisung 32 chiokdaksüogo saka tang tashi Naga nunger tebur trok mechiok lir.

Külen, Kuki Inpi Manipur-i Naga teloktem ket nung Kuki nunger 14 pua lir ta tai tongloksür.

Manipur nung security agencies-i samaba nisungtem bushitepdar aser tebilemstü koktetsü atema telok balala den jembishinüdar ta DGP Rajiv Singh-i ashi.

Births and Deaths registration online akümtsü

Dimapur, May 26, 2026 (TYO): Nagaland nung June 1, 2026 nungi Births & Deaths indang registrations ajak online system ajanga dang inyaktsü ta Economics and Statistics department-i metetdaksüogo.

June 1, 2026 matongdang agütsüba Birth and Death Certificates ajak official maparen atema amshitetstü aser digitization tenung nung senso shingia certificates tasen meshitsü nungdak madoker ta department-i ashi.

Nagaland state ajungalen

manual ajanga agütsüba Birth and Death Certificates digitization asütsü. Tarutsü nung Births and Deaths ajak designated online registration system ajanga dang inyaktsü ta parnokisa ashi.

District Registrars, Registrars, aser Registration Units-i online system inyakba nung nübortem yaritsü aser iba dak sendakba osang metetnürtem mesüra teyari aginürtemi bangdak District Registrars mesüra Registration Units dangi aotsü akok ta department-isa metetdaksüogo.

MLA tem den UNNATI 2024 Scheme & PM Vishwakarma osang lemsatep



Dimapur, May 26, 2026 (TYO): May 26, 2026 nü Department of Industries & Commerce-i MLA tem den UNNATI 2024 Scheme aser PM Vishwakarma atema sensaksemba sentong ka ayonga agiogo.

"Department-i Nagaland nung rongsenketzung jenjang renloka aotsü asoshi mangdang tulu yua lir. MSMEs aser shishilembartem ajanga Nagaland nung rongsenketzung aser mapa angutsüba maparen tashitaitba akümtsü" ta MLA & Industries & Commerce Advisor Hekani Jakhalu-i ashi.

Asenoki MSMEs shitak amentetra asen tayongzükba 70-80% tashi koktetsü. Anungji MLA temi public dang parnok asoshi maongka aser schemes balala tenzüka aliba osang metetdaksütsüla ta Hekani Jakhalu-i ashi.

Ministry of MSME kübok World Bank ajanga yariba RAMP (Raising and Accelerating MSME Performance) scheme tenzüka lir. Department ketdangsürtemi state nung kinük ajungalen sema iba osang prokshio. Constituency shia nug chichiba beneficiaries-i iba scheme indang tajanzük balala agitetstü. Iba scheme kübok high-potential MSMEs 750 anitetsü anungji

ANCSU-i KSC hostel project tenzüksü atema anogo 20 züngzüksür

Dimapur, May 26, 2026 (TYO): All Nagaland College Students' Union (ANCSU)-i Nagaland sorkar dang anogo 20 tsünga Kohima Science College (Autonomous), Jotsoma nung yipden 100 aliba girls' hostel yanglu tenzüksü mapang züngzüksüogo.

ANCSU-i tanü Mongulbarnü iba atema Nagaland Chief Secretary dangi shidi ka zülüogo aser iba nung pa dang mapan inyaktsü shiogo.

ANCSU-i züngzüksüba mapang tsünga mapa metenzükra ozüngi melaba ama

MLA temi pei pei constituency nung chichiba entrepreneurs jangjatsü ayongzük ta laisa metetdaksü.

Advisor Hekani-isa Aatmanirbhar Bharat Abhiyan kübok PMFME (PM Formalisation of Micro Food Processing Enterprises) Scheme indang osang lemsatepdang "iba ajanga micro-entrepreneurs, FPOs, aser SHGs tashi itdaksür" ta ashi.

Laisa handloom maparen inyakba tetsürtem dang Individual Weaver's Sheds atema tenüng meshi.

PM Vishwakarma ya skill development, financial assistance, aser market support ajanga sobaliba teka mapa inyakertem tashi itdaksütsü atema lir ta Hekani Jakhalu-isa metetdaksü.

"Northeast region nung UNNATI ajanga entrepreneurship atema temelenshi bentsür arur aser tang Nagaland nung iba scheme kübok 55 units lir" ta Industries & Commerce Secretary Kumar Ramnikant, IAS-i ashi.

Iba scheme ajanga Nagaland nung alirtem asoshi maongka jenti bentsür arutsü. Nagaland nung training programmes atema traditional trades trok shimteta lir

asur May 25, 2026 tashi nung PM Vishwakarma kübok artisans 1,939 nem training agütsüogo ta Ramnikant-isa ashi.

"Nagaland district ajungalen UNNATI indang osang prokshio. MLA temi pei pei constituency tem nungi iba scheme nungi teyari agitsü chichiba entrepreneurs jangjatsü aser rongsenketzung renloksü asoshi yariteptsü ayongzük" ta Industries & Commerce Director P. Tokugha Sema-i ashi.

"Department-i yimtsüng jenjang tashi nung mapa inyakdar aser yimdaklir rongsenketzung ajungkettsü atema textile sector ajungkettsü meranger" ta Industries & Commerce Additional Director Er. Lipongse Thongsar-ia ashi.

PMVK Team Nagaland-i osang lemsatepdang beneficiary shia nem PM Vishwakarma Certificates aser ID cards, Rs 15,000 jenjang toolkits, Rs 3 lakh (5% interest) collateral-free loans aser digital market linkage teyari agütsür ta ashi.

March 31, 2026 tashi nung Nagaland nung artisans 1,884 nem training agütsüogo aser iba scheme kübok Rs 3.91 crore aser toolkits 773 tashi agütsüogo ta PMVK Team Nagaland-isa metetdaksü.

tebilemstü abener. Iba ya bangdakpurtemi mapang agütsüba tsünga mapa metenzükteba ajanga lir ta ANCSU-isa metetdaksü.

State sorkari lemsükja aliba CSR amount kümzüka ayutsüla aser 100-bedded girls' hostel tenzüksüla ta parnokisa ashi.

Anogo 20 tsünga mapa metenzükra ANCSU aser kaketshirtemi Nagaland nung higher education aser kaketshirtem ajungtsü asoshi ozüngi melaba ama lungkak aittsü ta parnokisa Chief Secretary dang shiogo.

Kohima District Planning & Development Board senden menogo



Visezono Vakha-i HSLC Examination 2026 nung takok tajung ngutetba mechi Deputy Commissioner, Kohima, B. Henok Buchem, NCS-i Mongulbarnü DPDB Kohima senden amendang tetushi agütsüba mapang tangokba noksa nung angur.

Dimapur, Monupii/May 26 (TYO): Ita shia amenba District Planning & Development Board (DPDB) Kohima senden May 26, 2026 nü DPDB Hall, Kohima nung Deputy Commissioner & Vice-Chairman DPDB Kohima, B. Henok Buchem, NCS mendenpuba sür mena liasü.

Taoba DPDB senden nung lemteta aliba reprangshiba mapang ADC Kohima, Ruopfukuotuo Noudi, NCS ajanga blood donation campaign ayongzüksü aliba indang lemsatep, koba DPDB Kohima ajanga ayongzük, aser district ketdangsür ajunga dang azü tenla agütsü atema tajemba agi züngsem pongu bo anir arutsü mepishia liasü. Iba camp ya June 12, 2026 nü Capital Cultural Hall, Kohima nung ayongzüksü aser Nagaland Angh Nand Kishore Yadav sentong akhumdong ama shilem agitsü.

Board-i society registration atema Widows Nouzhie

Society, Hospital Colony, Kohima agizüka liasü.

Zhadima nung aliba 10th NAP (IR) Headquarters nem tzü supply agütsü onük jembidang, EE PHED, Er. Sedevilie Suohu-i JJM-I kübok inyakyim tembangogo saka JJM-II kübok inokdaksütsü atema Centre dangi proposal yoktetsü ta ashi.

DEO Kohima, Emilo Patton-i GHSS Kigwema nung Arts stream aser GHSS Jotsoma nung Science stream tenzükba osang lemsatepa liasü. School anaprong nung nungdakba criteria abensa aliba ajiteta board-i streams anaprong tenzüksü asoshi recommendation agütsütsü lemtet.

Kasa mapang DPDB Kohima ajanga Visezono Vakha nem tetushi agütsü, shibai High School Leaving Certificate (HSLC) Examination 2026 nung takok tajung ngua liasü.

La ya Rüzühkhrie Government Higher Secondary

School, Kohima nung lir aser Kohima district nung aliba Government High Schools ajunga rongnungi timtiba aggregate score of 92.1 per cent nguteta liasü.

DPDB Kohima-i la nem Certificate of Merit ka den senpet sen 30,000 agüja liasü.

Iba senden nung Assistant Electoral Officer (AEO) Kohima, Chisho ajanga electoral rool indang Special Intensive Revision (SIR) atema inyakyim aser mapang indang lemsatep.

Pai ashiba agi, Kohima district nung Assembly Constituencies trok nung polling stations 189 lir ta metetdaksü.

Revision atema quakifying date ya October 1, 2026 alitsü aser BLOs temi kibok sema verification maparen August 6 nung September 14 tashi inyaksü, draft electoral rool ya September 28 nü adoktsü aser final electoral roll ya November 22 nü sangdongtsü, ta ashi.

Chisho-i Aadhaar ya 'proof of identity' ama agizüksü saka proof of citizenship, address mesüra date of birth ama mamshitsü, ta ashi.

Senior Superintendent of Police (Sr. SP) Kohima, Krodi Rhetso-i district nung law and order tensa indang lemsatepa liasü.

Taruba DPDB senden nung Kohima Municipal Council ajanga Solid Waste Management Rules nung rangloker PowerPoint presentation agütsütsü nunglokja senden tembang.

Medziphema aser Tseminyu village nung ASF pokteta lir

Dimapur, Monupii/May 26 (TYO): ADC Medziphema, P. James Swu ajanga African Swine Fever (ASF) nungi kumzuka alitsü atema mera balala agitsü sangdong ka agütsüba nung, Chief Veterinary Officer, Chümoukedima ajanga Ward-9, Medziphema Town nung aliba farm nungi pig tissue sample bendener tendangba nung ASF aliba jangjaogo, ta ashi.

Iba tashidak tali prokshia aoba nungi kumzuka alitsü aser nüburttem aser kiset shiruru takum wazüka ayutsü mechi tang nungi tenzuka tarutsü nung sangdong ka magütsü tashi tenokdangba balala amshia alitsü, ta sangdong ajanga ashi.

Iba tashidak poktetba tesem nungi kilometer ka telongzük ya "Infected Zone" aser kilometer ter telongzük ya "Surveillance Zone" ta sangdonger.

Containment zones aser Surveillance Zone telongzük aser iba tesem nungi ak, ak chanu, ak shi aser ak shi agi yangluba chiyongtsü tem belenba okshia nokdang, iba tesem nung ayoktsü aser nija atema ak tepsetba, ak shi aser ak shi agi yangluba products tem ayoktsü aser alemtsü memelar, ta ashi.

Ak metsür aser iba tesem nung alirtem dang yimya balaka

nung ak shirangba mesüra asüba osang anasatiba Veterinary Officer mesüra Department nem metetdaksütsüla. Veterinary Department ajanga protocols aser guidelines agüja aliba ama ak tasü mang indoktsüla aser Veterinary Department-i ozüng amshiba agencies den teka amteper iba tashidak agi kongshia aliba tesemtem mita jajatsü.

Yimtsüng ketdangsür, ward ketdangsür, GBs, shi ayoker aser nüburttem dang Veterinary Department aser District Administration den 'surveillance, inspection aser containment' inyakyim nung amalitep akatsü metetdaksür. Iba totuyuba nung aibelener nem ozüng agi melaba ama tapet temerenshi agütsütsü, ta sangdong ajangasa ashi.

Ano maneni Tseminyu Village nungi tissue samples bendena bener oa Animal Health Care nung tendangba mapang African Swine Fever aliba jangjatetba Chief Veterinary Officer, Tseminyu nungi osang agütsüogo aser iba tesem ya "Infected Zone" ama sangdonger, ta Deputy Commissioner, Tseminyu, Japheth Woch-i sangdong ka nung metetdaksü.

Tseminyu temeket nung ak

kar asüba indanga Veterinary Hospital, Tseminyu nem osang agüja lir.

ASF ya kanga mela menatepa aoba tashidak ka lir, koba agi ak dak kongshir aser iba tashidak tali prokshia aoba nungi jenbua alitsü atema tekeraba nung mera agitsü nungdaker, ta DC Tseminyu ajanga ashi.

Anungji Tseminyu Village nungi kilometer ka telungtet ya "infected Zone" ta sangdonger aser Infected Zone nungi kilometer toku pilar telungtet tesemtem ya "Surveillance Zone" ama alitsü, ta ashi.

DC Tseminyu-i nüburttem dang infected zone aser temeket tesemtem nungi ak shi aliba, ayokba aser achiba nungi pila alitsü metetdaksüogo. Iba tesem nung ak aliba aser ayokba, tepsetba aser belenba ajunga nokdang. Ak tasü ongen arok-aroka tur aremstüla mesüra bio-security aser sanitary protocols nung aliba ama indoktsüla, ta ashi.

DC Tseminyu, Japheth Woch-isa CVO Tseminyu dang sorkari guidelines agütsüba aser SOPs ama surveillance, quarantine, containment, sanitization aser tashidak azüoktsü mera tem agitsü metetdaksüogo.

IMDH Mokokchung nung angati Super Speciality Medical Camp alitsü

Dimapur, Monupii/May 26 (TYO): Medical Department aser Mokokchung Municipal Council (MMC) ajanga 15th Finance Commission (XVFC) Health Grant teyari nung anogo ana super speciality health camp ka District Hospital, Imkongliba Memorial District Hospital (IMDH), Mokokchung nung May 29 & 30, 2026 anogotem ayongzüksü.

Iba camp mapang angati consultations atema Dr. Gnanaraj Jesudian, MBBS, MS - Urology aser Dr. Samuel Noklang, MD -

Cardiology ajurutetsü.

Doctor consultations ya angati alitsü, ajisiuka diagnostic investigations, lab tests mesüra specialized screenings nungdakra, itemji sen agitsü.

Iba camp atema terenemshiba ka ama preliminary screening IMDH Mokokchung nung tenzükogo. Urological mesüra cardiac conditions alirtem specialized care aginüa alirtemi screening atema tekeraba nung mozüki bushia arutsü akok, ta sangdong ka ajanga ashi.

Niuland TB Forum & DAPCC senden amen

Dimapur, Monupii/May 26 (TYO): Deputy Commissioner, Niuland, T. L. Kiusumong Tikhir ajanga May 26, 2026 nü Deputy Commissioner, Niuland indang Conference Hall nung District TB Forum & District AIDS Prevention and Control Committee (DAPCC) senden ka ayongzuka amen.

Iba senden nung Dr. Renchilo Ngullie, District Program Officer (DPO), Communicable Diseases (CD)-11 aser Orenthung Ngullie, DPO

DISHA nati district nung TB aser AIDS indang presentation

tejangja agüja liasü.

Iba senden nung senzüsempontsü tebilemstü, osettsüset agi meperiba, nübu agi anüngba aser sensamasa amshiba tebilemstü lemsatepa liasü.

Tikhir-i ketdangsürtem dang teyari atema district administration nem osang agütsütsü ayongzuka liasü aser DPO CD-11 dang district nung TB screening tali agitsü mepishia liasü.

Iba senden nung DISHA, DPO CD-11, NGOs aser kaketshir lenirtem dena liasü.

Environment and Climate Change, NLA züngsem temi Pfutsero semdang



Dimapur, Monupii/May 26 (TYO): Chairman, Environment and Climate Change, Nagaland Legislative Assembly, Achumbemo Kikon den par team züngsem temi Pfutsero nung jana indokba tesem aser mountain Radar system inoktsü aliba tesem semdanga Pfutsero nungi MLA

Dr. Neisatuo Mero; Deputy Commissioner, Phek, Rhoietho Nguori, NCS-i anir Administration team; SP Phek, Pritual Kaur; Town Coucil members; CPO aser Chakhesang Mothers' Association den sensaksemba senden ka Glory Peak, Pfutsero nung May 26, 2026 nü mena liasü.

Mon DPDB senden nung lenmang tasen yanglutsü indang jembi


Dimapur, Monupii/May 26 (TYO): Ita shia amenba Mon District Planning & Development Board senden May 26, 2026 nü Deputy Commissioner, Mon indang Conference Hall nung Deputy Commissioner & Vice Chairman DPDB, Mon, Wennyei Konyak, NCS lenisüba kübok mena liasü.

Parnoki taoba senden nung lemtetba lepa reprangshiba mapang Advisor Treasuries & Accounts, Art and Culture, K. Konngam Konyak ajanga Longwa Lailo Village nung GPS amenoktsüba aser Chingai Ward, Mon Town nung Elementary School re-approval atema DEO ajanga verification report agütsüba sülen sorkar dangi abentsü lemtet.

Iba senden nung MLA C. Manpon Konyak-i urban road kübok Aboi Town nung lenmang tasen yanglutsü onük benoka liasü. Item lenmang tasen ya GHSS Junction nungi Keiha Ward & Koiwang Ward ajanga Salom Orphanage Home tashi, Pinkhong (NH) nungi Soil office, Shamang Ward, Hahnyan Ward aser Mansham Ward ajanga Yongkim ward junction tashi, Hahnyan ward (Chaoha Morung) nungi Ayoiyang Ward (St. John School) & Police Station; Keiha Ward nungi Chinglong Road aser NH nungi Urban Cemetery ajanga Keiha Ward tashi alitsü.

Lokti-i asadanga jembiba sülen Urban Road kübok lenmang tasen ya inoktsü atema sorkari dangi yoktsü lemteta liasü.

India, US na critical minerals atema tenangzüktepba yangluogo



New Delhi nung Quad foreign ministers tem senden amenba mapang. Abelen nungi, Australian Foreign Minister Penny Wong, External Affairs Minister S Jaishankar, Japanese Foreign Minister Toshimitsu Motegi aser US Secretary of State Marco Rubio.

New Delhi, Monupii/May 26

(Ageencies): India aser US nati critical mineral tem supply dak sendakba nung kecha tetsükdaktsü madoktsü atema sendaktepa inyaktüsü asoshi tongtibang framework ka yangluogo.

China-i rare earth elements aser strategic metals tem export dak sendakba nung tazüokba kar agütsüba sülen tang iba jenjang ya agiogo. Item mineral tem ya global technology supply chain tem atema kanga tongtibang lir.

New Delhi nung Quad foreign ministers tem senden amenba mapang critical mineral tem mining aser processing dak sendakba nung framework ka nung sign sütepogo.

"Iba ya mapang shitak nung

yangluogo aser kanga tongtibang lir," ta External Affairs Minister S Jaishankar-i US Secretary of State Marco Rubio matsüngdang ashi.

"Iba framework ya mining, processing, recycling aser investment densema critical minerals aser rare earth supply chain dak sendakba nung tesendaktep akangshitsü nükjidadong nung benokogo," ta pai ashi.

External affairs minister yagi ashiba agi, iba framework ajanga supply chain tem, project tem atema sen entoktsü aser critical minerals aser rare earths tajungba ketdang asütsü atema teyari agütsütsü.

"Alima nung tetsükdaktsü aika saka maongka kangabo maliba mapang iba ajanga onok tsüngda tesendaktep tajung

aliba sayur," ta pai ashi.

Kasa mapang nung Rubio-i, US aser India na tsüngda tesendaktep indang jemi aser iba ya linük anaprongla atema koda tongtibang iba indang lemsatapa liasü.

Rubio-isa US-i nongita yariba Pax Silica inyakyim indang jemi.

"Iba atema na onoki Washington DC nung Critical Minerals Forum ayonba nung adenba mapang tamendakdakbo yanglur liasü," ta pai ashiba den India-i Pax Silica nung sign asüba sülen inyakyim takarabo odar ta shisem.

Pax Silica inyakyim ya critical minerals aser artificial intelligence supply chain takang ka yanglutsü atema December ita amenoka liasü.

CM Suvendu-i bendanger tem nem tekümdangtsü metetdaktsü



Suvendu Adhikari

New Delhi, Monupii/May 26

(Ageencies): West Bengal sorkari ozüing alema state-i arur alirtem anema jenjang tali agi tenzükogogo aser BJP lenir tejen Suvendu Adhikari-i ozüing alema arur alirtem dang sorkari jenjang magi tsüngda jena aotsü metetdaktsüogogo.

Iba ken o indang jembiba mapang CM Adhikari-i ashiba agi, ozüing tasen ka kübok masü saka tang benoka aliba Foreigners' Act kübok iba jenjang ya agidar. "Iba ya ozüing tasen ka masü, saka tang benoka aliba Foreigners' Act lir. Parnoki tangsa tang iba tesem toktsür aotsüla," ta pai ashi.

CM Adhikari-i, lisopurtem meyipa agizüktsüji Bangladesh

khuret lir, ta ashi. "Asen linük nungi yokba lisopurtem agizüktsü atema renema lir Bangladesh-i shiatokogogo," ta pai ashi.

CM-isa, pai ozüing alema arur alir asütsü ta temulung melemi bilemertem tepuokdaki meyoktsü police nem tetuyuba agütsüogogo, ta ashi. "Asenoki kechiba parnok ayutsü? kechiba India sen lalutsü? item ozüing alema arur alirtem ya asen anükapang asü," ta pai ashi.

Nüburtemi parnok mulungka nung state toktsür mora jenjang tesashi agitsü ta pai tekümdangtsü metetdaktsüogogo. "Idak nungi takaratiba nung oang, ajita mesüra sorkari

jenjang tesashi agitsü," ta pai ashi.

Mongolbar anepdang North 24 Parganas district kübok Hakimpur nung arrtsü nung loki ka adenshia liasü.

Item nisungtem ya Bangladeshi-i aotsü atema adenshi asütsü ta amanger, kechiyong state-i ozüing alema aruba Bangladesh nung anema jenjang tali agi tenzükogogo.

Special Intensive Revision (SIR) inyakyim mapanga kasa ya atalokogogo.

West Bengal sorkari bendanger asütsü ta temulung melemi bilemertem ayutsü atema centre tem inyaksangshi tenzükshi tenzükba sülen tang iba ya atalokogogo aser sorkarisa "detect, delete and deport" policy kübok jenjang tali agi tenzükogogo.

West Bengal nung BJP sorkari ozüing alema state-i arur alirtem anema inyakyim tesashi benoktsü ta shia arudar. State administration-i, ozüing alema arur alirtem aser talisa Bangladesh aser Rohingya nungertem dak rangloker "detect, delete and deport" policy benokogogo.

AIADMK MLA Esakki Subaya TVK nung adentsü atema resign asü

New Delhi, Monupii/May 26 (Ageencies): All India Anna Dravida Munnetra Kazhagam (AIADMK) legislator Dr Esakki Subaya shiba SP Velumani aser C Ve Shanmugam telok nungi lir, pai Mongolbarnü Tamil Nadu assembly speaker JCD Prabhakar nem resignation shiti agütsüogogo.

Pa ya Ambasamudhram assembly constituency nungi lir, aser anogo ana tsüngda party MLA pezü resign asüba rongnung ka kümogogo.

Pa külem party MLA Maragatham Kumaravel (Madurantakam reserved), P Sathyabama (Dharapuram reserved) aser S Jayakumar (Perundururai) nung tsüngsü nung anidaka Tamilaga Vettri Kazhagam (TVK) nung denogogo.

Resignation agütsüba sülen pai Secretariat nung TVK ministers N Anand aser K A Sengottaiyan na den ajurutepeba sorkar kümteter aliba party nung denogogo.

Edapaddi K Palaniswami-i aniba (EPS) AIADMK telok aser Dravida Munnetra Kazhagam (DMK) nati iba jenjang agiba ya MLA tem alizükba

inyakyim ka lir ta shiogo.

May 13 nü C Ve Shanmugam - S P Velumani teloki floor test agiba mapang TVK pusemba sülen AIADMK yongtsü nung telem dang adokba temai adoka liasü.

AIADMK-i assembly election nung menden 47 akok. Tanungba MLA 22 ya EPS telok nung dang lir.

Subaya shiba Tirunelveli district kübok Ambasamudram menden asemen kokogogo, pai ashiba agi, par constituency nungi nüburtem ola angadanga sülen iba telemtetba ya agia liasü.

"Ni asoshi tinyaktsü tongtibangtibaji kü constituency nung nüburtem ya lir. Parnok ajangzükdaktsütsü asoshi temulung dang yur iba jenjang agiogo. Ni jurila taginüba aser maginüba kecha mali. Constituency nung aliba nüburtem atema ni iba telemtetba agiogo," ta Subaya-i ashi.

Chief minister ajurutsü majurutsü ta asüngdanga mapang pai, "CM ajuruba atema kecha tai malia mesüra tamajung masü. maongka dang agütsüra ni CM den ajurutptsü, shiba tang tashibo kanga junga yimsüsüa arudar," ta ashi.

Tamil Nadu CM Vijay-i Bodhbarnü Delhi semdangtsü



New Delhi, Monupii/May 26

(Ageencies): Tamil Nadu Chief Minister ama tenangzüktepba agiba sülen anogo ishika lir Vijay-i May 27 nü Delhi semdangtsü, kong pai Ato Kilonser Narendra Modi, Union minister tem aser Congress state atema tongtibang project tem aser senotsü teyari atema sensak asemtsü imlar.

Delhi semdangba mapang Vijay-i state atema senotsü teyari talila meshitsü aser Tamil Nadu nung infrastructure aser development project tongtibangtem atema Centre nungi temelaba meshitsü imlar.

Paisa Congress lenir tejen Sonia Gandhi aser Rahul Gandhi na ajurutsü imlar.

Mekedatu Dam Project dak sendakba nung Vijay-i PM Narendra Modi dang iba Detailed Project Report ya magizüktsü atema Union Jal Shakti Ministry aser Central Water Commission (CWC) nem tetuyuba agütsütsü mepeshia asüngdangogogo.

Delhi semdangba mapang Chief Minister-isa, Tamil nung

nüngtugu sangro zülur Thiruvalluvar indang kerak yanglu ka Tamil Nadu sorkari Jawaharlal Nehru University nung amenokja aliba lapoktsütsü.

Vijay-i aniba Tamilaga Vettri Kazhagam (TVK) party-i election koka Tamil Nadu Chief Minister akümba sülen hopta ka ana lir pai tang Delhi semdang.

Tamil Nadu Chief Minister 13buba ama Vijay-i May 10 nü tenangzüktepba agi, aser iba ajanga DMK aser AIADMK nati küm aika state yimden yimsüsüba amokbanger arua aliba tembangdaktsüogogo.

Assembly elections nung TVK-i menden 108 koka parnok menden timtiba akokba party aküm, aser iba sülen Congress, Left parties, VCK aser IUML den longjemer sorkar kümteta liasü.

Iba ita tetenzüklen Tamil Nadu sorkari cabinet tasenba atema portfolios lemtsüogogo aser Vijay-i Home, Police, Municipal Administration, Urban and Water Supply, Women Welfare, aser Special Programme Implementation department tem bena lir.

Sorkar tasenbai cabinet jenjang nung Artificial Intelligence department ka tentetogogo, aser iba ajanga Kerala sülen Tamil Nadu ya state tem rongnung iba department amenokba tanabuba state kümdak tsüogogo.



TIR YIMYIM YIMOBILEM (EDITRIAL)

DIMAPUR WEDNESDAY, MAY (MONUPII) 27, 2026

Asenok ya Assam leni meyiper

India nung British nungger yimsüsüba mapang Naga nungertemi Britiish yimten dang parnoki kodang India nem yimten nüchiso agütsür, Naga nungertembo India kübok masü saka parnoka balaka alitsüsa yutsür oang ta tezüluba nung agütsü, ajisüaka British nungertemi Naga nungertem ya India telungjem kübok Assam state nung adentsüsa yutsür ao, anungji tang Nagaland ta asüba lima ya state balaka maküm tashibo Assam kübok dang liasü. Naga nungertemi India nungger den tereprangtsü nung dang masü saka sobaliba kenyongi balala asünungji, India nungertem den külemi melinübaji shitak dang liasü, ajisüaka kechiba British nungertemi India telungjem kübokang alitsüsa yutsüar ashitsü makok. Ashiko, iba mapang Naga nungertem rongnung nübortem len anitsüsa tazüngtemeteter peria mali asüba agi temulung melemtet asütsüa akok. Ano, aji dang masü saka British nungertemia Naga tenem ajungabo ayimbanga yimsü mesütet, anungji India nungi razüka ano alima balaka ser Naga lima lazüktsübaji British yimten asoshia mapang meshitak liasü südi. Aji oda, ashiko, Britiish yimteni Naga nungertemi mulungba ama masü saka India nung Assam kübok alitsüsa toktsür aoba ya, Naga nungertem ya parnok kisung ser yimten jenjang balaka alangteta alitsübaji metemsü aser memeshi ta parnoki bilema India nungger ket nung toktsür orr alitsüa akok. Atangji, Naga nungertem ya India nungger masü asü aser tanüa yimten ozüng agi alenba agi dang ashi, shitakba lipok, sobaliba aser tereprangtsü agi India nungger masü. Ibayongji, tanü asüng lanurtemi mejembir dang ashi, yashi tashi tsüraburtemibo Naga lima ajanga aodang India- i aoer ta jembi aser Naga lima adena orr azüngertem danga, tangar bendang lima ka nung oa azünger ama India len azünger ta jembia aru. Iba amaji India nungger o Naga nungger na bendang-bendanga lia aru aser langa liang teli, Naga nungertemi British nungertemi India toktsür orr külen Naga yimten nüchiso asoshi tesashiba aser telungjemba kümer raraan aru. Ajisüaka, India nungger ket nung timtem reshikangshi kanga ajuruba agi maremtet, Naga nungger tazüngtemeteterteri anir Naga yimten nüchiso melen Assam nungi razüka state-ang balaka meshizüktet. Iba mapang tashi Assam kübok aliba lima aser nisung süaka, Assam nungertemi Naga nungger yimten aser lokti lenirtem kanga akümstübu aru, kechiyong Naga nungertem ya British aser America nungertemi sayutetba nübortem liasü. Iba jagi, tashitemetet nunga aser terenlok mapatem inyakba nunga Assam nungertemi Naga nungertem kanga akümstübu. Aji oda, alimabo tilaba aser tesensakba saka Assam Chief minister dangbo Nagaland chief minister-ang tambu aser temetetba ama yimten sobalibaren nung züngshia aru. Ajisüaka, tanübo Naga nungger Assam kübok lia liasüba nungi razüka orr küm 65 ajungdang, ano tanaben meyipa orr Assam kübok alir amai asenok yimten nung akhüm maket akümba aser rongsenren nung aluba aser terenlok mapatem inyakba nung nümadangdanga sayutsüsa kecha maka akhümba agi, Himanta Biswa Sarma sentsüa makok nümamedangteti ka kümogo. Aji oda, Assam nung tangarbo azüklen ayong aser yimti temdanga asenok foothill road piga apu yanglur. Guwahati tonga maoyonga, Dimapur nungi minute 30 dang agi atongba Diphu town repranga senzüdangra, yangji akaba flyover, apu, ka agi Dimapur nung akaba flyover-bo noklang ka shi asütsüsa sentsüwangshia yanglur angutsü. Aji oda, asenok akhi mapang Assam kübok alidang ama, tang taneptsü bushia Guwhati aoba ya asüngbo Nagaland nung angutsü melen Dibugarh aser Diphu nung akaba mozü kitem bushia aotsü aser akhi mapang tsüraburtem Guwahati nung azüng ama, tanü lanurtem ya Diphu, Jorhat, Mariani aser Dibugarh nung azüngtsü, anungji asen lima nung akaba school aser collegetem ya tazüng akümstü ! Tang tangbo Nagaland ya Northeast yimten senden nung nümadanga wajak nung amentsülabo masü kümogo. Iba tensa tia nungi asenok tekong songteta adoktsübaji ochi aser teindang leniba agidang anir adokdaksütettsü.

OLEMSABANG

MERAJEMBA TEKUREM

~ L. Temjenwapang

(Iba Yimdangjem otsü ya Tir Yimyim aser Bookipedia nati ayongba toktep nung shilem agirtem rongnung ka liasü)

(Yashi adok nungi...)

Joko aluruwa tsük ajak ki tongseper, tanübu ayong ka sepa armen sena chiyongi odi ta sür kenü Wangshiba tetsü aser tebu par asem ayong kati ao. Kidang nungi apuso dang par asem ya kanga meimteba alir asü nung Wangshibai Oja, khu ya ni benti (ta meshi). Khu ka nung par asem tanü chiyongtsü chitem inoka lir. Tetsü-i langzü aya tebu nai Ojala meimba agi khu melenzüktsü asüngdang, kanga pelar, saka nenok asüng nungi kibalembutsü idangji kibong khuret agi benü mebenü ta masü khu ajak abentsü anungji tanübo ojai bendi jong nebu nena tama sang ta langzü. Wangshiba mulungjang nung kanga kongshi aya ketsü i tarutsü atema tena yamai khuret bentsür- a na ya ta tetsü temeimji ano banüji tali jangja.

Küm tepiyong alu wadang balala inyak dang belemba ajak ama sütöksünema senzütsü jangra pelatepa aoba mapang, joko arem tiyong ka nung jaja dang lenmang tezü külen ola ka lasa-lasa nunga angashi anungji par asemprong zep ta nokdak aser angadang, idangji ano olaji sa nunga angashi. Anungji Wangshibai tanem tanemi oa reprangdang nung nisung ka longtaka lir ama angu. Yakta ola tulu adoka oa nisungbaji meso, saka temang ajakji azü agi yimpanger temang ajunga zübo agi sünger liasü. Anungji yakta ajungteper lendi jagi bener adok aser reprangdang nung pa temba Rongjenba liasü, idangji Wangshiba-ji kanga aoksa aser temba- temba ta jashia ajep, idangji tetsü o tebu na jaki yakta azü jemdangtsü süngo tu kar bendena menoka züboji amtsü aser tebu- i ashi; ya yakta ki atongba tajungba asütsü, anungji tebu nai nü temba-ji pongang aser tekeratiba nung yim bushidi ta sür joko meyiba kidangi adok, kechiba süra obala Rongsenba jaki pa yiruba yimyaji meteter liasü. Joko ki tonger kiyong kinar ajak sentepa anogo tepiyong yariteper nikongtsütsü Rongjenbaji tera nisungba yimdangi arunung tatalokbatemji asüngdang.

Rongjenba; Ozü tsük ano tera ki metongsepi ali nung ni tanübo aji benmatsü nükjidong nung tanep tera jilia apusoa aoba mapang alu lenmang nungji ajungbena Kiyi ka arua ponglok, kü ket nung nok dang liasü anungji kiyi denji rara melangtep dang ni kanga yiru aser azü yimtokba ajanga ni kanga lula aküm. Kiyi jaki ni ngusetsü lia nisung ola kar angashia kiyi- ji ajen aser ni kecha memeteti aküm. Nisung ola angashiba-ji Wangshiba, tetsü - tebu par asem ola liasü, idangji yakta arem nung tebu-i ashiba tu bilemtet. Yiru-a aliba tesem nungi yakta anshitsü tebu-i kanga aritepa ajungmeso, ibatu obalai meteter liasü ta idangjiang rajema-a aru. Temba, nisung ola tu kütsü, kübü ozü asem otsü atongteba ayongi aorba. Rongsenbai; Aya temba tanü ner kibongi ni kümzükba ya ni kodanga mamatsü kü tepang agi meshitetba pelar ni yabo mamatsü. Joko alima ajungalen zulutsü, azüngtsü, meteta aru, shishilembatsü tenzük yimtsüng nungji, lanurtembo pei wadang balala asoshi jila (town) aser yim ka nungi ka ta jajatsü tenzük, talongtsütem balala asen lima tonga aru, tsümartema asen lima shishilemba senzü, ano asenoka nungdakterem jaja-a shishilembatsü kanga hobita aküm. Iba mapang kenü anogo anünglak nung tayimtsü ka arüa ao.

Idangji yimertemji ajak kima len adoker alemli yimdak tambur ka asüba lepko nung ya kechi shiruru ta süngmanga reprangtepa tu shiruru masü, tayimtsü ka süirba liasü ta parnok menütepa panüjiang metet. Mapang kobi meli-i Wangshiba par tzükong len Mohory mapa ka angu. Yamaji anogoshia pa mapa nung lenmang repranga jajaba mapang bendangtsür ka junga ngushi, laji mapangshia parnok mapa inyaklenji sa süir, idangji menürema jembili tasa asür. Ayirla jembishinüji tepuatsüka liasü, soro kanga jungrabo masü saka aso ajenbo asüketa motonger jembishinüji tejangja, ano osüjia tanganütsüka jembiteteter, ano iba den külemi lai tsümar o-a ka ana inoksemasa jembir.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh nung tamanger timtemba ketdangsüri merepranger



Tribal Khristan temi May 16, 2026 nü Chhattisgarh state nung Kankaer district kübok Antagarh area nung fact-finding team indang züngsem ka nem parnoki timtem ajangshibatem tezüluba nung agütsüba noksa nung angur.

Raipur, Monupii/May 26 (Agencies): Chhattisgarh state nung tribal Khristanpuri, April ita tetenzüklen nungi parnok yimtsüngtem nung tamangba yimsü mechi tajemtsü tzü aser tanga nüngdakba maongka magütsüba asoshi timtemba lemsatepba ketdangsür temi mereprangi senzüka yutsür ta ashir.

"Onok jashir aser tezü atanger, kechiaser yimtsüng aser district level ketdangsürtem dang onoki aiben mepishiaka onok sarasadem mangashir," ta Jila Masih Astha Samaj tir Pastor Mohan Gawal-i UCA News dang May 22 nü ashi.

Tribal nisungtem timba aliba Kanker district nung denominations balala agi tentetba Khristanpuri May ita tiyonglen yimtsüng 32 nungi nisung 60 dak tema ajurutsü asoshi fact-finding team ka yoka liasü.

Gawal-i ashiba agi, iba district kübok Antagarh area nung kibong 26 tashi ayong, tsübo, water taps aser hand pumps densema tzü sources magütsür aser kibong 41 rural employment guarantee scheme nungi züngdokba bushitet, koba makamaiter asoshi teyari agütsüba scheme ka lir.

Ano kibong 115 tendu tu bendenba nokdang, koba bidis mesüra teaditional atema taleptsü, hand-rolled cigarettes ama amshir aser iba ya tribal nisungtem asoshi sen aruba lenmang tongtipang ka lir.

Tribal Khristan kibong pezüü arem nungi tatsüksü süng tractor-trolley load pezü bendena aliba külem yimdaklir temi tashiyim amshia rakzük ta fact-finding team yagi ngutet.

Tribal Khristan temi collector aser superintendent of police densema temaba ketdangsürtem dang April 28 aser 30 nü tezüluba agüja liaka yamai inyaker, ta Gawal-i ashi.

Timtem ajurua aliba kibong temi April 11 nungi village-level ketdangsürtem danga aiben mepishio, saka yimtsüng aika nung tenokdangba ya lir.

"Parnok tebilemstü tensa ka nung lir. Tajemtsü tzü aser sen anguba lenmang maka meyi mapang süyitsü ya shisadangtsü tasak," ta Gawal-i ashi.

"Khristan kibong aika dak par tamangba yimsü mechi tenük yokba ya atangji lir," ta pastor-i ashi aser parnok yamaji timtem ajurua liaka parnok tamang nung akang-akanga lir ta ashi.

"Parnok aiben meta talang nung aliba yimtsüngtem nungi ammag nung aser miima tzü atatsüsa akumer," ta Gawal-i ashi.

Onok tamangba yimsü yutsüdaktsü atema parnoki item tenokdangba ya agütsür, ta Khristanpuri fact-finding team dang ashi.

"Parnok dang tekülem kidangi maotsü aser parnok mezüng amanga aliba yimsü (Hindu) dangi meyiptsü ajungshir," ta Progressive Christian Alliance (PCA) coordinator Pastor Simon Digbal Tandi-ia ashi.

Item kibong temi meyi mapang parnok alu ayimba nunga tetsükdaktsü ajurutsü südi ta tetsübo nung lir, ta Tandi-i ashi.

Tajemtsü tzü aser livelihoods ya takum alitsü temeden aser human dignity den sensaktepa lir ta pastor temi ashir.

"Tamangba yimsü nung ajemdaker yamaji amshiba ya shidak asünungbo, constitution aser human rights tsütsü tebilemstü tuli lir," ta parnoki ashir.

Kanker district nung tensa jangjadaktsütsü aser item kibongtem nüngdakba temeden kumzüka ayuba nung yaritsü asoshi media, legal aid, human rights aser civil society telok tem den parnok lokti tentet tem ajanga state aser central sorkar dang mepishia lir.

Yangji aliba ketdangsür temi aiben Khristanpur dak tenük yoker mapa tamajung inyak ta tai tonglokja alirtem merenshitsü melen tangatetep kati arutsü ang ajungshir ta pastor temi ashi.

Rights activists temi Chhattisgarh nung Khristanpur anema azüdokshiba aser mapa tamajung inyakba indang aiben ola adoka arur.

2024 küm Khristanpur dak tenük yoker mapa tamajung inyakba 165 liasü, koba linük nung iba ama atalokba timtiba jenjang tanabuba nung lir, ta New Delhi nung aliba United Christian Forum ajanga ashir.

Chhattisgarh nung nütsüng yongzük million 30 shi aliba nungi Khristanpur shilem ana majung, kong Hindu nungger timba lir.

ANOGO ABEN TSÜNGREM DEN

Osangtajung benjung

"Kechiyong ano asenok tashi maitdang, mapang shitak nung Khrista temenenpur atema asü (Rom 5:6).

Temeshipur ajatsü asoshi Khrista alimai maru. Nisung tajung asoshi Pa kangkii matu. Pa temenenpur asoshi asü. Atangji Tsüngrem tsüngdang nisung ajak memeshiba purtem lir. Ajak temenen nung aso aser memerükba nung tain aküm. San ama ajaki lenmang aia ao, aser memeyip. Tsüngrem tenük temerük tsüngdang asen ajak memerüki lir. Asen tajungtiba mapaji Tsüngrem tsüngdang jana-rüja süjen ama lir.

Tebilemstüji nisungi pei memerükba taküm Tsüngrem nem bendanga agütsütsü memulunger. Yimti ka nung leni maortem asoshi benjung ka ayongzük. Kar talungtsü nung anir aru, kar teka nung amer anir aru, kar apua apua aru. Konang benjungji tenzük, kishi nükeri tanur ka kilungi maitdaktsü kishi züng nung mener jepya angu. Pai tanur dang "Kechiba ajeper? ta asüngdang." "Kechiaser parnoki ni manioker". "Kechiba parnoki na manioker?" "Kechiaser kü dak kecha timtem mali."

Ne dak langka timtem lir ta nai angateta melira na osangtajung benjung nung adentsü metemsü. Benjung kilungi aitsü temelaba angutsü asoshi nai naji temenen nisung ka ta angatettsü tenüngdaktsü. Memeshibapur asoshi Yisu asü.

Pakistan nung Khristanpuri temeden wazüka ayutsü lenmang bushir



Minority Alliance Pakistan (MAP) ketdangsür temi May 21 nü Islamabad nung aliba National Press Club nung osangbener den jembidang tangokba noksa ka yangi angur.

Islamabad, Monupii/May 26 (Agencies): Pakistan nung Khristanpur lenirtemi tanga minority telok den lungjemer linük nung federal structure melenshitsü asoshi constitution yanglushitsü aliba nung tamangba yimsü tsütsü kin tila tem, tetsür aser tanurtem kumzüka ayutsü aser yimdenren nung shilem agitsü asoshi ozüng tashi taitba akhanger.

Draft 28th Constitutional Amendment kübok melenshitsü sentong aliba ajanga Muslim nungger timba aliba linük nungya yimtenyimsüsür aser nüburtem o inteper, kechiaser federal government ya coalition partners den shisa agitepba mapang lir.

"Tema tazütsü agi nokdaktsü mapang süyio.

Tang nüngdaka aliba ya ozüng matsüngdang ajak sako aser senso ajunga nem maongka kasa agütsütsü asoshi temelenshi ya lir," ta okatsür aser Minorities Alliance Pakistan (MAP) nung mendenpuba, Akmal Bhatti-i ashi.

MAP nungya Khristanpur aser tanga tamangba yimsü sülen anidaker telok tilatem ajanga kumtetba alliance ka lir, aser parnoki May 21 nü National Press Club, Islamabad nung osangbener senden ka nung jembia liasü.

Iba senden nung Khristanpur tenüng nung Rawadari Tehreek mesüra Movement for Pluralism Chairman Samson Salamat, Pakistan Minorities Alliance Chairman aser taoba Punjab provincial lawmaker Tahir Naveed Chaudhry, aser

Minorities Rights Movement tir Robin Daniel Bhatti nungertem liasü.

MAP indang tebilemstü tulutiba ya tanurtem tashiyim amshia tamangba yimsü melendaktsüba aser tanur kibong kumdaktsüba atema ozüng teperi lidaktsütsü ya lir ta parnoki ashi.

MAP ajanga proposals agütsüba nungya talenba kübok judicial magistrate ajanga mejangjai arishi küm 18 tekübok tamangba yimsü melensüba nokdangtsü akhangba dena lir.

Inyakyim nung bendanga amshiba yur pluralistic democracy ka ta mejembitettsü ta parnoki ashir.

Pakistan ya Islamic republic linük ka lir, kong Muslim nungger ang tir aser ato kilonser mapa inyaktettsü.

(Maneni tapak 8 nung...)

AO OSHI ANGAZÜKDAK:

TANÜ ANGAZÜKTSÜBA OJANG



Yim

(n) nisungtem teti atema kiojen yanglur külemi aliba tesem (village)

* Nagaland nung yim tulu aika lir.

Yima

(v) telongi ajak ia adok (all got inside)

* An chanu ajak an kidangi yima.

OLONG PAITEP # 7516

15x15 crossword grid with numbers 1-15 indicating starting positions.

TIPLÉN

- 2. Sü jeplok - (4)
4. O agi merenshi - (5)
7. Ayongküm li - (5)
8. Chiyungtsü mapang süiadok - (4)
9. Tsüngrem den jembiba - (9)
12. Saklok - (4)
14. Samaba mebushitet - (5)
15. Mejanga onü - (5)
16. Tzü shiruru ka - (4)

LANGTSÜNGLEN

- 1. ____ i - (4)
3. Kasa masü - (6)
5. Nüchi masü - (5)
6. Tashi endok - (5)
9. Langtem - (5)
10. Anü malidang - (6)
11. ____ kibur - (5)
13. Tebur tembar tsüngda jatepba - (4)

OLONG PAITEP # 7515 TELANGZÜBA

TIPLÉN :

- 2. Pongsen, 5. Lepko, 7. Omen,
8. Maongka, 10. Yangkhu,
12. Senpong, 14. Angu, 15. Raksa,
16. Arameso.

LANGTSÜNGLEN :

- 1. Alimang, 2. Pongen, 3. Samaru,
4. Nün, 6. Pio, 9. Nüngdak,
10. Yongya, 11. Kongro, 13. Ora,
14. Ata.

NAI-A YA METETTER



Mexico City-i Mexico nung football putiotsü aser sobaliba tushia 200 square metres tema nung mural ka sayaogo aser iba atema Guinness World Record ka nguogo.

2026 World Cup matongdang Mexico City-i brushes aser acrylics dang amshia iba mural talang yangluogo.

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Arunachal Pradesh-i kümshia Pineapple Festival amungtsü lemtet



Itanagar, May 26, 2026

(Agencies): Arunachal Pradesh sorkari Arunachal Pineapple Festival Bagra (Pineapple Expo) ya kümshia amungba benjung ka asütsü metetdaksüogo.

Arunachal Pradesh nung horticulture sector aser rural economy ajungkettsü atema sorkari iba lemtet agi.

"Iba lemtet agiba atema Arunachal Pradesh Chief Minister Pema Khandu aser state Cabinet dang kanga pelar" ta All Bagra Welfare Society (ABWS)

Chairman & President Er. Dumar Bagra-i ashi.

Iba lemtet tajung ajanga jiru tsünürtem, aluyimertem, self-help groups aser rural entrepreneurs asoshi maongka bentsür arutsü aser iba ya talisa West Siang district nung asütsü ta Er. Dumar-i ashi.

Arunachal Pineapple Festival ya mezüing 2024 nung ayonga amung. Iba sülen nungi iba benjung ya local agriculture, Galo tribal culture, hospitality aser tourism asoshi sabang tajung ka

kümogo.

West Siang district kübok Bagra circle nung jiru tanang aser nutritional value aketba adoker. Iba tesem ya "Pineapple Bowl" ka akümstsü lenmang sadema lir aser exporters, food processing industries, tourism stakeholders o agricultural investors atsür arutettsü ta benjung ayongertemi ashir.

Aalo West MLA Topin Ete-i iba benjung 'official recognition' atema inyakba asoshio pelar ta ABWS-isa metetdaksüogo.

Mizoram sorkari police personnel 350 shimoktsü

Aizawl, May 26, 2026

(Agencies): Mizoram sorkari police personnel 350 aser home guards 94 shimoktsü asoshi recruitment drive ka alitsü ta Home Minister K Sapdanga-i metetdaksüogo.

Sorkari yaküm ama recruitment exercise ka ajanga unarmed constables 150 aser armed police personnel 200 shimoktsü ta Home Minister Sapdanga-i ashi.

Sorkari Mizoram Home Guard (MRHG) personnel 94

shimoktsü atema recruitment notification agütsüogo. Ajisüaka tang recruitment drive ya teburtem atema dang asütsü kechiyong women's quota süngogo ta pai ashi.

"Candidate tem merit nung dang ajemdaker shimtsü. Nisung kari candidate tem yarinüa bilerma parnok physical fitness training nung yariangma" ta Sapdanga-isa metetdaksü.

Home guard pur küm asem atema shimtsü aser rules lateta

aliba ama extension mesüra termination asütsü akok ta paisa shisem.

Sapdanga-isa Urban Development and Poverty Alleviation portfolio bona lir aser pai state sorkar indang Mission Urban Drain (MUD) project osang lemsatop.

Aizawl nung urban safety infrastructure akangshitsü atema Rs 35 crore endoktsü. Iba nung landslides, drainage congestion aser urban flooding atema mapa inyaktsü ta pai ashi.

Amit Shah-i June 5 nü Tripura semdangtsü akok

Agartala, May 26, 2026

(Agencies): Union Home Minister Amit Shah-i June 5 nü Tripura semdangtsü akok aser idangji India-Bangladesh international border nung security arrangements aser border infrastructure repringdangtsü.

Amit Shah-i semdangtsüba asoshi tatembang lemtet ano magi saka iba asoshi maparen inyakdar ta Tripura sorkar nungi osang ka ajanga angazükogo.

Tripura-i Bangladesh den kilometer 856 agi arrtsütepa lir aser iba jagi Centre aser state

sorkar atema border management aser security asoshi kanga süoki ia bilemer.

Union Home Minister Shah-i arrtsülen semdangtsü aser ground-level security arrangements asadangtsü imlar. Iba mapang pai barbed wire fencing aser surveillance systems enokba repringdangtsü.

Amit Shah-isa Border Security Force sepaitem den ajurutep sensaksemstsü aser central security agencies, Tripura Police o state sorkar tsüngda amalitepa meyipa

repringtsü. Amit Shah-i semdangba mapang Ministry of Home Affairs, Tripura sorkar, Border Security Force, Tripura Police aser district administrations nungi ketdangsurtemi sendentem nung adentsü.

Centre-i border security infrastructure tashi itshitsü, India-Bangladesh arrtsülen ozüing alema aruba, arrtsü adena mapa inyakba aser shibelenba anema maparen akangshitsü merangba mapang ka Amit Shah-i Tripura semdangtsü.



May 25, 2026 nü Union Minister of State for Youth Affairs and Sports, Raksha Khadse-i Imphal nung National Sports University (NSU) semdangdang agiba noksa ka angur. Raksha Khadse-i NSU indang permanent campus semdang aser idakji athletes, students, coaches aser officials den ajurutepa sensaksema liasü. MoS Khadse-isa Northeast region nung sports ecosystem asadanga nung shilem ka ama Sports Authority of India (SAI) National Centre of Excellence (NCOE), Imphal semdanga liasü.

Iran den yimjung tezüngzüktep yanglutsü anogo ishika agitsü: Rubio

Jaipur, Monupii/May 26 (Agencies): Mongulbarnü US Secretary of State Marco Rubio-i Iran den yimjung tezüngzüktep asoshi jembishiniü akaba nung anogo ishika agitsü akok ta ashi, anungji iba rara yakta tembangtsü teimla aliba samatsür.

US sepaitemi southern Iran nung tesem balala amakba sülen Rubio-i iba o ya ashi.

Iran indang Revolutionary Guards temi ceasefire nung aibelenba asoshi telangzüba agütsütsü temeden lir ta ashir, aser Iran indang Supreme Leader Mojtaba Khamenei-ia region nung aliba linüktem US bases atema jong ama masütsüla ta shiogo.

Linük anaprongi rara anena Strait of Hormuz ajanga rong tem senzü tenzükshitsü atema memorandum of understanding nung terenlok aliba ama sayua liasü aser item ken o jembirtem dang Iran indang nuclear sentong densema tali tebenja ken o tem anogo 60 tsüngta jembitsü mapang agüja liasü.

US-i mines yutsütsü merangba rong tem aser missile khaloktsüba tesemtem densema targets kar amakba sülen Rubio-i Jaipur, India nung pa indang tayimtsü nung menden osangbener den jembidang, Strait of Hormuz ya külen mesüra külen nungi

lapoktsüla, ta ashi. US aser Israel nati February 28 nü Iran maka tenzükba rara ya ajanga alima nung totzü tebilemstü kadaktsür. Iran-i telangzüba agüja Gulf linüktem nung US sepai alodak drones aser missiles khaloktsü.

Rara metenzükdang Strait of Hormuz ajanga anogoshi rong 125 nungi 140 tsüngta senzüa liasü, saka tangbo kanga ajema kumogo. Alima nung totzü aser liquefied natural gas shilem 20 shi iba tzü lenmang ajanga abener.

April ita tetenzüklen ceasefire sangdonga liaka Hombarnü U.S. Central Command-i ashiba agi, "Iran sepaitemi lendong timtem agütsüba nungi ozü sepaitem kumzüka ayutsü atema ano amak."

Mongulbarnü Iran indang Revolutionary Guards ajanga ashiba agi, par indang air defence units ajanga US indang drone ka khazüka yok aser ano drone ka aser fighter jet ka dak khaloktsü, kechiaser item ya Gulf region nung Iranian airspace telungi ait.

Iran indang Supreme Leader Mojtaba Khamenei-i hajj pilgrimage benjong mapang pa indang Telegram channel nung, "Anü tetsü memeyiptetsü, aser region nung linüktem aser ali tem American bases atema jong ama masütsü," ta zülua liasü.

"Tang nungibo 'Death to America' aser 'Death to Israel' yimyim ya Islamic linük aser alima nung ajemrepba nüburtem, talisa lanurtem indang yimyim asütsü," ta pai ashi.

Trump-i Hombarnü Truth Social nung Iran den jembishiniüba kanga junga otar ta ashi saka yangji tamakok ajurura asendenshir amaktsü ta tekumdangtsü shia liasü.

Trump-isa Saudi Arabia densema Arab aser Muslim linük tali dang Abraham Accord nung meyongnem agütsütsü ayongzüka lir, koba pai item linük aser Israel tsüngta tesendaktep junga akumtsü nükjidong nung pa mezüing kümsük mapang tetsüngtai ia renema liasü.

Ajisüaka Saudi Arabia-i Palestine nung nem linük temeja agütsütsü asoshi roadmap ka memulungtep tashi iba accord nung meyongnem magütsütsü ta ashir.

Ano Israel Ato Kilonser Benjamin Netanyahu-i Hombarnü ang Lebanon nung Iran-i yariba Hezbollah telungpur dak Israel-i tesashiba amaktsü ta ashiba ajanga region nung tensa tamajungba akumer. Israel aser Lebanon na April ita tiyonglen ceasefire ka züngzüktep, ajisüaka Israel-i southern Lebanon nung maneni amaker.

Australia-India-Japan-US senteper rongnendak ka yanglutsü

New Delhi, Monupii/May 26 (Agencies): Australia, India, Japan aser US foreign ministers temi Fiji nung rongnendak ka yanglutsü mulungtepogo aser critical minerals aser energy security ayimjema tenangzüktepba kar yangluogo. Linük pezüi tentetba telok dang ya Quad ta ajar aser iba telok tashi itshidaktsütsü atema tang iba jenjang ya agiogo.

Australia FM Penny Wong, India FM S. Jaishankar, Japan FM Toshiimitsu Motegi aser U.S. Secretary of State Marco Rubio nung senden tatsüka menogo, koba 2024 kum September nungi tang tashi nung iba telok senden tasembuba liasü.

Iba telok longjemer mezüingbuba infrastructure project ka inyaktüsü metetdaktüsügo, koba Fiji nung rongnendak ka yanglutsüba lir.

"Onoki rongnendak infrastructure amala ken o dak sendakba nung longjemer inyaktüsü, kechiyong iba Pacific tzüyim nung aliba asetkong nung rongnendak peri mali. Onok Fiji den longjemer inyaktüsü sentong aliba sangdonger," ta Rubio-i ashi.

Washington-i tariffs talila benokba aser tanga ken o dak sendakba nung U.S. tir Donald

?Trump aser India Ato Kilonser Narendra Modi na mangatettep adokba ajanga lenirtem senden mementetba sülen taoba kum linük pezü agi kumtetba iba telok inyaksangshi bangdaka liasü.

"Onoki tanem tanemi takoktem sayu tenzükdar," ta Rubio-i ashi. "Iba partnership asoshi onok ajak bendanga agütsür lir. Linük ka ama US asoshi iba ya onok indang global strategy nung tongtibang tamendakdak ka lir."

Paisa, iba telok yagi Indo-Pacific Energy Security and a critical minerals framework dak sendakba nung inyakyim ka benoktsü atema mulungtepogo, ta shisem.

Minerals framework ajanga critical minerals supply chains tashi itshidaktsütsü kong mining aser processing densema lir. Iba ajanga critical minerals recycling nunga teyari agütsütsü ya Rubio-isa shisem.

Iba inyakyim ya Japan asoshi kanga tongtibang asütsü, kechiyong China den mangatettep adokba sülen aerospace, defence aser semiconductor industry tem nung amshiba mineral kar China-i parnok nem magütsü kumogo.

New Delhi-i, Trump dang India semdangtsü shia arudar, koba Quad summit ka dak

sendaka alitsü ta bilemer. Ken o asadangertemi ashiba agi, lenirtem jenjang nung senden ka danga mamenba ajanga iba telok tashi meiti kümdaktsür asütsü akok.

Foreign minister temi taküm summit ka amentsüba dak sendakba nung kecha osang magütsü, saka hopta tatem Rubio-i ashiba agi, taküm kum tatemlen senden ka amentsü atema diplomat temi inyakteptsü.

"Lenirtem summit mamenba ajanga ken o kar mejangjai kümdaktsüogo, saka iba tetezü iba telok koda tongtibang ibaji sama aoba mesayur," ta Melbourne nung Asia Society Australia senior policy fellow Premesha Saha-i ashi.

"Quad yagi ministerial aser working level tem nung maneni inyaktetra, lenirtem jenjang nung senden mamen yonga kecha masü," ta paisa shisem.

China tashi tali kuma aoba ya Quad linük ajak asoshi tebilemstü ka kumogo aser Rubio-i Indo-Pacific ya ajak asoshi koda sadem sadema lapoka toktsütsü tongtibang iba indang lemsatepogo.

Linük pezü yagi East China Sea aser South China Sea nung tensa mejungi aliba maneni süoki ia bilemba lemsatepogo. (Maneni tapak 8 nung...)

OFFICE OF THE
DIMAPUR LONGJANG PONGENLAR TELONGJEM
Dimapur - 797112: Nagaland.

KONANG TETUSHI AGÜTSÜR



Wabong Asür Ojensungba Pongen aser Watsü Akangnungla Aier (Longjang), tena jala Kongro **Dr. Latongliia Pongen-i** Department of Geography, Nagaland University nungi "Assessment of Geomorphological Hazards in Mokokchung District" nung Doctorate degree ngutetba asoshi Dimapur Longjang Pongenlar Telongjem menden ajanga tepelaba tulu den konang tetushi agütsür.

Tang aser tarutsü anogotem nung asen Tulusang Tsüngremi asen yimer aser kidong asoshi nü sempet aser wadang nung teti azük-arua moajangma.

Sd/- Wangshila Pongen
President

Sd/- Arenla Pongen
General Secretary

PELABA LEMSATEPER



02/01/1987 **17/05/2026**

Aser tamasa aliba ama aoyiji alii meyiper, aser tanelajibo tagütsüsang Tsüngrem dangisa shilangtsü. Sayutsungir 12:7

Onoki teti dang meima aliba kü kinungbo asür **Imnatangit** (Changtongya Yimsen) mapang tatsüka shiranger iba lima doktsür aoba mapang shirnokisa onok mulung süngzüktsü o agi, nübu agi, rongsen agi aser Sarasadem agi onok den yaritepoko ajak dang pelaba iba osang ajanga metetdaktüsür. Maneni item telok dang pelaba metetdaktüsür

- 30 Assam Rifles commandent and All Rank
- Assam Rifles Ao telungjem society
- 30 Assam Rifles Naga group
- Changtongya Assam Rifles Telungjem
- Sunrise ward (Changtongya town)
- NCRC CTN town Centre

~ Temeim Kinungtsü, jabaso, Tsürabur aser adianu.

File No. Admin-18011(11)/14/2026-eoffice
Government of India
Ministry of Health and Family Welfare
Directorate General of Health Service
Central Drugs Standard Control Organization
(Drugs Section)

Ministry of Health and Family Welfare ajanga temsüa aliba candidates nungi Central Drugs Testing Laboratory, Chennai nung tsünglanglen shia aliba post nung Deputation yimya nung inyaktüsü asoshi application meshir. Application ya iba advertisement Employment News nung adoker anogo 60 tsüngta agizüktsü.

2. Tali tejangjaba metettsü atema Ministry indang websitehttps://mohfw.gov.in or CDSCO website https://cdsco.gov.in nung angutsü.

Sl. No.	Name of the Post	Pay as per 7 th CPC	No. of Post	Office for which the post is filled up
1.	Junior Scientific Assistant	Pay Level-6 of 7 th CPC (Rs. 35400 – 112400)	1 (one)	Central Drugs Testing Laboratory, Chennai

Deputy Director (Admn), CDSCO HQ,
FDA Bhawan, Kotla Road, New Delhi-110002
CBC : 17194/11/0005/2627

Roberts aser Davies yirur aliba nungi meyipa arur Wales atema asayatsü



Connor Roberts

Ben Davies

Monupii/May 26, 2026

(Agencies): Captain Ben Davies tetsüing teloktep kanga mejungi yirur aliba taneptsü anguba sülen Ghana aser Romania na den friendly asayatsü aliba atema Wales' squad nung züingoksemogo, kasa mapang nung Connor Roberts-a küm ka tsüingda tang mezüingbuba linük team nungi asayatsü imlar.

Tottenham Hotspur defender Davies, shiba taoba ita arishi küm 33 jungogo, pa January ita club nungi asayaba mapang yiruba ajanga surgery agitsüsa akümba sülen tang tashi khen danga masayai lir.

Burnley right-back Roberts-a 2025 küm June ita World Cup qualier nung Belgium makokba asaya nung yiruba sülen masayai liasü.

Arishi küm 30 tain asayar ya Brussels nung asayaba mapang groin yiru aser iba sülen Burnley atema asayaba mapang Achilles yirua 2025-26 season tepeyong masayatet.

Roberts ya tang asaya aliba season nung Deobarnü mezüingbuba first-team-i meyipa aru, saka Wolves den asaya nung pa masayadaksü.

Kasa mapang nung centre-back Chris Mepham-a yirur aliba nungi meyipa aruogo, saka midfielder Jordan James aser Rubin Colwill na aser forward Liam Cullen aser Mark Harris nungerbo terara yirur aliba ajanga masayatettsü.

Wales pur June 2 nü Cardiff City Stadium nung Ghana den asayatsü aser iba sülen kasa hopta Honibarnü Bucharest nung Romania den asayatsü.

Wales squad:

Goalkeepers: Karl Darlow (Leeds United), Danny Ward (Wrexham), Tom King (Everton).

Defenders: Jay DaSilva (Coventry City), Rhys Norrington-Davies (Queens Park Rangers - on loan from Sheffield United), Ben Davies (Tottenham Hotspur), Dylan Lawlor (Cardiff City), Ben Cabango (Swansea City), Joe Rodon (Leeds United), Chris Mepham (West Bromwich Albion), Neco Williams (Nottingham Forest), Ronan Kpakio (Cardiff City), Connor Roberts (Burnley).

Midfielders: Ethan Ampadu (Leeds United), Josh Sheehan (Bolton Wanderers), Joel Colwill (Cardiff City), Kai Andrews (Hibernian - on loan from Coventry City), Harry Wilson (Fulham), Sorba Thomas (Stoke City), Lewis Koumas (Hull City - on loan from Liverpool), David Brooks (Bournemouth).

Forwards: Nathan Broadhead (Wrexham) Brennan Johnson (Crystal Palace), Kieffer Moore (Wrexham) Dan James (Leeds United), Isaak Davies (Cardiff City).

Singapore Open: Sindhu-i Putri koka tanabuba round-i iogo

Monupii/May 26, 2026

(Agencies): Olympic nung medal ana koker alila PV Sindhu-i Mongolbarnü Singapore Open tetsür kija asaya mezüingbuba round nung fifth-seed Putri Kusuma Wardani koka tanabuba round-i iogo.

Asaya metenzük tsüingda Indonesia tsür Wardani-i iba asaya akoktsü imlar liasü, saka Sindhu-i la tajangshibatam amshia kanga junga asayaogo. Tena tsüingda tang tashi nung 5 ben asayar lir aser Wardani-i asem aser Sindhu-i ana koker liasü.

Mezüingbuba game nung Sindhu 11-15 agi tesülen liasü, saka iba sülen lai kanga junga asaya-a point 10 ngua 21-15 agi asaya akok.

Tanabuba game bo kanga toktepa asayaogo, saka Sindhu-i 21-18 ta tera agi asaya akok. La tanabuba round nung Japan tsür Riko Gunji den asayatsü. Tena tang mezüingbuba asayatsü lir.

Thailand Open nung quarterfinal tonga asayaba sülen Sindhu tang Singapore Open nung asayadar. Taküm küm tetenzüklen la Malaysia Open nunga semifinal tonga asayaogo.

Ajisüaka Mongolbarnü India

nunger tanga asayartemi junga masayateti tsükogo. Tetsür tarep asayar Ashwini Bhat aser Shikha Gautam na Chinese Taipei tsür Chang Ching Hui aser Yang Ching Tun nati straight games nung akok.

Tarep temeyoktep asayar Rohan Kapoor aser Ruthvika Shivani nata Chinese Taipei nunger tarep Yang Po-Hsuan aser Hu Ling Fang nati straight-games nung akok aser Unnati Hooda-a eighth seed Tomoka Miyazaki-i tsükdakja liasü.

Tetsür tarep asaya nungsa Kavipriya Selvam aser Simran Singhi na game asem kanga toktepa asayaba sülen Spain tsür Paula Lopez aser Lucia Rodriguez nati tsükdaktsüogo.

Tebur tarep asayar Hariharan Amsakarunan aser MR Arjun nata seventh seeds Takuro Hoki aser Yugo Kobayashi nati straight games nung kokogo.

Tebur kija asayar Ayush Shetty, Canada nunger asayar Victor Lai-i tsükdaktsü. Sindhu sülenbo India nunger rongnungi Satwiksairaj Rankireddy aser Chirag Shetty nati dang takok ngua liasü. Tenati USA nunger tarep Chen Zhi Yi aser Presley Smith na tsükdaktsü.

KHRISTAN OSANG :

Tapak 5 nungi...

Pakistan nung Khristanpuri temeden wazüka...

Muslim nunger masürtem linük indang tematiba office nung memendaktsütsü tenokdangba constitution nung aliba aser direct democratic representation asoshi telatet yuja aliba MAP-i kanga sashia aitsür.

Iba ya metongshitsü atema alliance ajanga national aser provincial assemblies nung Muslim nunger masürtem aser tetsürtem asoshi menden wazükja aliba atema indang-indanga elections agitsü ashir.

Parnoki 'propotional allocation system agientsü akhanger, kechiaser iba ozüing kübok ozüing yanglur menden wazüka aliba nung amentsü atema nüburtemi indang-

indanga shimer masü political party lenirtemi shimer.

Iba ya ajanga vote agütsür temi mulungba ama democratic yimya shidak nung lenir shimtsü, ta MAP-i ashi.

Ajidang masü federal aser provincial civil services aser kakat reju ajunga nung tamangba yimsü tsütsü minorities asoshi employment aser admissions quota teti atema shilem tajemba agi pongu bo alitsü parnoki akhanger.

Item temelenshi atema sorkar sen tali indoktsü mesüra administrative ulushitsü menüingdaker, kechiaser item ya Constitution of Pakistan nung tang aliba tamangba

yimsü temeden nung shia lir ta MAP-i ashi.

MAP-i Parliamentary Committee on Constitutional Reforms dang minority lenirtem, legal experts aser civil society stakeholders tem den shisa agiteper ang amendment bill yanglutsü ajungshi.

Parnoki item tezüluba ya Tir Asif Ali Zardari, Ato Kilonser Shenbaz Sharif, Senate Chairman Yousaf Raza Gillani, aser National Assembly Speaker Sardar Ayaz Sadiq tem dangi yokogo.

Pakistan nütsüing yongsük million 241 aliba nungi Hindu nunger shilem 1.61 (3.8 million) aser Khristanpur shilem 1.37 (3.3 million) lir.

BENDANGLI OSANG :

Tapak 7 nungi...

Australia-India-Japan-US senteper rongnendak...

Parnokisa Middle East nung shishilemba dang amshiba rongtem amakba aitsüogo aser ashiba agi, tolls agiba ya parnoki anemer. Parnokisa, Strait of Hormuz aser temerem tzyüim nung teküzmükba kübok minprong kecha makai shishilembateptsü koda tongtibang iba indang lemsatepogo.

China-i South China Sea ya ajunga amai parnok meyong ta ashi aser mangatettep adoker

aliba tesemtem nung military facility tem yanglua arudar. Southeast Asian nung aliba linüktem aikati tzyüim nung parnok shilema lir ta shia arudar. Kasa mapang nung China aser Japan na East China Sea nung alinük kar atema mangatettep adoker lir.

Beijing-i Quad telok tentetba ya Cold War mapang tentetba telok mesüka lir ta shia aitsüogo, koba parnok terenlok aziüoktsü nükjidong nung tentetba lir ta

ashi.

Mongolbarnü parnoki linüktem tsüingda tesendakep ya tangar kar dak rangloker masü saka yimji-yimjung dak rangloker asütsüla, ta ashi.

India-a China den arrtsü nung tesem kar nung mangatettep adoker lir, ajisüaka Trump den mangatettep adoker aliba mapang Modi-i Beijing den tesendaktep yanglushitsü atema mulunga aliba lemsatepogo.

AC Milan-i coach Allegri mapa nungi anentsüogo

Monupii/May 26, 2026

(Agencies): Champions League atema qualify mesütetba sülen AC Milan-i parnok indang head coach Massimiliano Allegri mapa nungi anentsüogo.

Serie A asaya tatembangbuba anogo Cagliari goal 2-1 agi makokba sülen Milan pur tasembuba jenjang nungi pezübubai asepzüka alu aser küm anabuba atonga Champions League asayamung atema qualify mesütet.

Inter Milan, Napoli, Roma aser Como nunger taruba season Europe nung ajak dang tematiba asayamung atema qualify süogo aser AC Milan pur Juventus den Europa League nung asayatsü.

"Season nung mapang talangbaka onok Serie A nung tanabuba jenjang nung liasü aser asayamung akoktsü atema timla liasü," ta American investment group RedBird Capital-i sangdong ka ajanga metetdaksü. Iba telok yagi 2022 küm AC Milan alizüka liasü.

"Asayamung tatembangleni

aruba mapang onoki imlaba ama junga masayatet aser season nung tatembangbuba asaya nung tamakok anguba sülen onok tamakok nung tembangogo.

"Football operations yanglushitsü atema mapang tongogo," ta kasa sangdong ajanga metetdaksü.

Chief executive Giorgio Furlani, sporting director Igli Tare aser technical director Geoffrey Moncada nungeria club toktsüogo, ta club kibur-i metetdaksü.

Arishi küm 58 tain Allegri ya tanabenbuba AC Milan nung taoba küm May ita aden aser pai Sergio Conceicao melena liasü.

2010 nungi 2014 küm tashi pa lenisüba nung club asaya aser 2010-11 season nung parnoki league akok aser taruba season Italian Super Cup koka liasü.

Milan pur iba season nung tatembanbuba asaya 13 nungi tenet nung tamakok angu aser parnok anemer Inter Milan puri season asem nung league tanebenbuba koka liasü.

BILEMDANGANG

"Taküm ya kanga tongmelang saka asenoki tebenja kümdaktsür."